

36,000 pendeposit SSPN1M layak terima sejak dibuka 1 Januari lalu

Peluang dapat geran RM500

Oleh FIRDAUS ABDULLAH

KUALA LUMPUR – Sebanyak 36,000 pendeposit Skim Simpanan Pendidikan Nasional 1 Malaysia (SSPN1M) bagi pelajar Tahun Satu hingga Enam yang berdaftar sejak 1 Januari lalu layak menerima geran sepadan RM500 oleh Perbadanan Tabung Pendidikan Tinggi Nasional (PTPTN).

Ketua Eksekutif PTPTN, Wan Ahmad Wan Yusoff berkata, sambutan amat menggalakkan berikutan RM500 insentif geran sepadan tersebut akan diberikan kepada 500,000 pemegang SSPN1M terawal bagi tahun 2018.



“Setiap akaun SSPN1M pelajar perlu mempunyai simpanan sekurang-kurangnya RM500 pada tahun ini untuk layak mendapat geran sepadan ini yang telah diperuntukkan melalui pembentangan Bajet 2018.

“SSPN1M merupakan pelan simpanan terbaik disediakan oleh PTPTN bagi tabungan pendidikan anak-anak pada masa hadapan,” katanya ketika berucap pada Program Sumbangan SSPN1M di sini semalam.

Turut hadir Timbalan Ketua Eksekutif Bahagian Kewangan dan Sokongan PTPTN, Azhar Ahmad dan Pengerusi Yayasan Pendidikan Kawasan Bandar

Tun Razak merangkap Ketua Barisan Nasional Bandar Tun Razak, Datuk Chew Yin Keen.

Pada majlis sama, Yin Keen turut menyampaikan sumbangan sebanyak RM50,000 kepada 1,000 pelajar Tahun Satu hingga Enam di kawasan tersebut sebagai wang deposit permulaan SSPN1M mereka.

Chew Yin memberitahu, usaha yang dilakukan PTPTN tersebut dapat mengurangkan pergantungan pelajar sepenuhnya kepada pinjaman untuk melanjutkan pelajaran.

“SSPN1M secara tidak langsung dapat mengurangkan bebanan ibu bapa yang berasal dari golongan berpendapatan rendah untuk menanggung kos pendidikan anak-anak pada masa hadapan,” ujarnya.



WAN AHMAD (berdiri, tiga dari kanan) bersama Yin Keen (berdiri, empat dari kanan) bergambar dengan sebahagian penerima Deposit SSPN1M bagi kawasan Parlimen Bandar Tun Razak, Kuala Lumpur semalam.